



Raissa Rudge di Colegio Arubano a keda eligi Presidente nobo di Parlamento Hubenil

DIA 18 januari ultimo, Comité PR di Asociación Consejo Hubenil a eligi Raissa Rudge como Presidente. Raissa Rudge ta representa di Colegio Arubano Oranjestad y a wordo huramenta como miembro dia 11 december 2007.

Raissa Rudge den su prome palabranan como Presidente a duna di conoce e.o. como Presidente e ta kere ta importante pa traha riba e imagen di Parlamento Hubenil. Te ainda hubentud no tin

hopi conocimiento di e organización, como Presidente e ta kere den e meta y vision di e organización, pa crea lidernan y defende hubentud riba tur tereno.

“Mi vision ta cu Parlamento Hubenil lo tuma su rol como un di e pilarnan den nos comunidad. Otro cu e promocion di Parlamento Hubenil, nos lo traha tambe riba promocion di nos tema, cual ta ‘Abuso di Menor’, un problema grandi y te ainda scondi den nos comunidad, mi tambe kier a recorda

boso riba e proyecto benidero cual ta ‘Kiblando Gritonan Silencioso’ di cual lo bin un obra di Corsow cu yama ‘Mare Bo Por Muri’, pa mas informacion riba esaki, por bishita nos myspace cual ta www.myspace.com/pharuba”, segun Raissa Rudge.

Relaciona cu e temporada di Carnaval, Presidente di Parlamento Hubenil kier a haci un suplica na tur hoben pa no usa droga y alcohol. Carnaval ta un temporada hopi dushi, caminda tur hende kier goza, pero haci esaki riba un manera responsable.

Y como adulto sea un bon ehempel p’e muchanan, p’asina nan siña comporta nan mes como debe ser.

Durante e temporada aki hoben ta haña nan mes involvi den relacion sexual y hopi biaha esaki ta sosode sin proteccion, pesey nos di Parlamento Hubenil un biaha mas ta traha hunto cu Women’s Club asina purba di combati e problema.